

Brojne žrtve napada na nigerijskoj pijaci

20 februar 2012 Izmijenjeno 23:09 CET

Trgovci kažu da je naoružana grupa usmrtila 30 ljudi, dok vojska tvrdi da je spriječila Boko Haram u namjeri pokolja



Boko Haram je odgovoran za niz smrtonosnih napada uglavnom na sjeveru Nigerije [Reuters arhiva]

Najmanje 30 ljudi je poginulo u napadu naoružane skupine na pijaci u gradu Maiduguri na sjeveroistoku Nigerije, kazali su svjedoci. Napadači, za koje vojska sumnja da su pripadnici grupe Boko Haram, upali su na pijacu i počeli pucati, kazali su za AFP pijačni trgovci, dodavši da među ubijenima ima žena i djece. „Broj poginulih ne može biti manji od 30“, kazala je za AFP medicinska sestra iz bolnice u Maiduguriju. Vojska je potvrdila da se napad na pijacu dogodio, ali je demantirala informacije o civilnim žrtvama, dodajući da su snage sigurnosti ubile osam napadača i deaktivirale bombe koje su ostavili napadači, prenosi Reuters. „U 13.30 sati na pijaci Baga u Maiduguriju napadači, za koje se pretpostavlja da su pripadnici Boko Harama, napali su i pucali na civile na pijaci“, izjavio je portparol specijalne vojne jedinice u tom gradu Hassan Mohammed.

Iskaz trgovaca

Trgovkinja Mairami kazala je za AFP da je šest naoružanih muškaraca upalo na pijacu i zapucalo na građane, pri čemu je stradalo najmanje 30 ljudi. Drugi trgovac, Gana, opisao je isti događaj u gradu Maiduguri, uporištu Boko Harama, grupe koja je odgovorna za niz smrtonosnih napada uglavnom na sjeveru najmnogoljudnije afričke zemlje. „Naoružani ljudi otvorili su vatru i pobili ljude. Vidio sam tri vojna kamiona pretrpana tijelima kako napuštaju pijacu. Nakon pucanja desile su se tri eksplozije“, dodao je Gana. Napadači su optužili trgovce da sarađuju s vojskom nakon prošlosedmičnog hapšenja jednog pripadnika Boko Harama na toj pijaci, kada su ga trgovci savladali i predali vojnicima.

Boko Haram se opire vlastima i tvrdi da želi uvesti islamski zakon u zemlji s 160 miliona stanovnika. Polovina stanovnika su muslimani, a druga polovina kršćani.

Izvor: Al Jazeera